



Broj/Број: 01/2a-50-1-2-19/08  
Sarajevo/Сарајево: 15.1.2008.

## **ZAPISNIK**

### **19. sjednice Komisije za vanjske poslove Predstavničkog doma Parlamentarne skupštine Bosne i Hercegovine, održane 15.1.2008., s početkom u 10 sati**

Sjednici su prisustvovali članovi Komisije: Slavko Matić, Milorad Živković, Milica Marković, Azra Alajbegović i Husein Nanić, izvjestioci - Zoran Perković iz Ministarstva vanjskih poslova BiH i Sabrija Šerifović iz Ministarstva vanjske trgovine i ekonomskih odnosa BiH. Odsustvo su opravdali: Azra Hadžiahmetović, Sefer Halilović, Sadik Ahmetović i Denis Bećirović.

Prije usvajanja dnevnog reda, predsjedavajući Matić predložio je skidanje s dnevnog reda tačke 6. (Razmatranje međunarodnih posjeta članova Komisije s posebnim osvrtom na kriterije odabira i načina odlučivanja o sastavu članova), zbog odsustva Denisa Bećirovića koji je predložio pomenutu tačku dnevnog reda.

Ovaj prijedlog jednoglasno je usvojen te je za sjednicu usvojen sljedeći

## **DNEVNI RED**

- 1) Usvajanje Zapisnika 18. sjednice Komisije za vanjske poslove Predstavničkog doma Parlamentarne skupštine BiH, održane 28.12.2007.;
- 2) Davanje saglasnosti za ratifikaciju Sporazuma između Vijeća ministara BiH i Vlade Islamske Republike Pakistan o osnivanju Bosanskohercegovačko-pakistanske ekonomske komisije (predlagač: Ministarstvo vanjske trgovine i ekonomskih odnosa BiH);
- 3) Utvrđivanje Prijedloga za imenovanje interparlamentarnih grupa prijateljstva Parlamentarne skupštine BiH ;
- 4) Razmatranje Izvještaja o radu delegacije PSBiH u Parlamentarnoj skupštini Vijeća Evrope u 2007. godini;
- 5) Razmatranje Informacije Ministarstva vanjskih poslova BiH o ratifikaciji Sporazuma između BiH i Evropske zajednice o olakšicama prilikom izdavanja viza;
- 6) Rasprava o komunikaciji i odnosima BiH sa susjednim zemljama (prijedlog za tačku dnevnog reda Milice Marković);
- 7) Tekuća pitanja.

### **Ad. 1. Usvajanje Zapisnika 18. sjednice**

Zapisnik 18. sjednice Komisije usvojen je jednoglasno, bez primjedbi.

### **Ad. 2. Davanje saglasnosti za ratifikaciju Sporazuma između Vijeća ministara BiH i Vlade Islamske Republike Pakistan o osnivanju Bosanskohercegovačko-pakistanske ekonomske komisije (predlagač: Ministarstvo vanjske trgovine i ekonomskih odnosa BiH)**

Obrazloženje o ovom sporazumu dao je predstavnik resornog ministarstva Sabrija Šerifović koji je rekao da su njime regulirani osnovni principi rada komisija i da je ovakav sporazum do sada potpisan s Rusijom te da je ovaj sporazum sa Islamskom Republikom Pakistan drugi po redu tog tipa. On je predložio davanje saglasnosti na ovaj sporazum nakon čega je predsjedavajući Matić otvorio raspravu o pomenutom sporazumu. S obzirom da nije bilo rasprave i pitanja prisutnih u vezi sa Sporazumom, pristupilo se glasanju i data je saglasnost jednoglasno.

### **Ad. 3. Utvrđivanje Prijedloga za imenovanje interparlamentarnih grupa prijateljstva Parlamentarne skupštine BiH**

Predsjedavajući Matić podsjetio je da je ovu tačku dnevnog reda bilo potrebno razmotriti s Komisijom za vanjsku i trgovinsku politiku, carine, saobraćaj i komunikacije Doma naroda kako bi se utvrdio zajednički prijedlog. No, kako nije došlo do održavanja zajedničke sjednice dvije komisije, predsjedavajući Matić konstatirao je da će Komisija za vanjske poslove utvrditi svoj prijedlog i mišljenje i uputiti ga Kolegiju PDPSBiH. Milorad Živković je, imajući u vidu zahtjeve pojedinih poslanika, kao npr. Hadži Jovana Mitrovića, da ne učestvuje u grupama prijateljstva, sugerirao da se u prijedlog unese i pojašnjenje da pojedni poslanici nisu izrazili želju da budu u grupama prijateljstva. Također, Živković je predložio da se takav prijedlog za imenovanje interparlamentarnih grupa prijateljstva uputi Predstavničkom domu s prijedlogom da se prihvati. Ovaj prijedlog je, nakon glasanja, jednoglasno usvojen.

### **Ad. 4. Razmatranje Izvještaja o radu delegacije PSBiH u Parlamentarnoj skupštini Vijeća Evrope u 2007. godini**

Živković je obavijestio prisutne da je Vijeće Evrope uputilo pismo Kolegiju PD sa zahtjevom za održavanje rasprave o Vijeću Evrope i njegovim aktivnostima i to jednom godišnje. U okviru te rasprave trebalo bi ujedno razgovarati o radu bh. delegacije u VE, koji, prema mišljenju Živkovića, nije za pohvalu, dok je Izvještaj o radu delegacije dobro urađen. Milica Marković ocijenila je Izvještaj dobrim, detaljnim i iscrpnim. Iznijela je i primjedbu na tehničku grešku, na strani 6., u Izjavi Bakira Izetbegovića, člana delegacije. Osvrnula se na rad delegacije i iznijela informaciju da članovi bh. delegacije u nekoliko navrata nisu bili obaviješteni o sastancima komiteta na kojima bi trebalo da učestvuju a ne samo na zasjedanjima PSVE. To smatra lošim u radu delegacije, a prema nezvaničnim informacijama, kojima raspolaže gđa Marković, razlog ovome je ušteta finansijskih sredstava. Gđa Marković predložila je da se na nekoj od sjednica PD razmotre odobrenja za učešće članova delegacije na sjednicama komiteta. Milorad Živković predložio je da se uputi zaključak delegaciji u VE da u budućnosti o svom radu sačini informaciju umjesto izvještaja. Predsjedavajući Matić na kraju je rekao kako bi predložio prihvatanje Izvještaja i njegovo upućivanje Predstavničkom domu kako bi se na 20. sjednici Doma raspravljalo o radu Vijeća Evrope s posebnim osvrtom na rad delegacije. Ovaj prijedlog jednoglasno je prihvaćen.

### **Ad. 5. Razmatranje Informacije Ministarstva vanjskih poslova BiH o ratifikaciji Sporazuma između BiH i Evropske zajednice o olakšicama prilikom izdavanja viza**

O ovoj tački dnevnog reda govorio je izvjestilac Ministarstva vanjskih poslova BiH pomoćnik ministra Zoran Perković. On je rekao da je Sporazum stupio na snagu 1. januara 2008. jer su nadležna tijela završila postupak ratifikacije i da je nakon toga Sporazum objavljen u "Službenom glasniku BiH". Osim ovog sporazuma, BiH je potpisala pet bilateralnih sporazuma s evropskim zemljama van Šengena ( V. Britanija, Irska, Norveška. Island, Lihenštajn...) Husein Nanić, član Komisije, zahvalio je na informacijama koje mu

ipak ne daju odgovor na pitanje - Zašto je toliko dugo trajala procedura zaključivanja ovog sporazuma? Ili konkretnije - zašto je sporazum tako dugo stajao u Vijeću ministara BiH? Matić je također izrazio nezadovoljstvo činjenicom što je tako važan sporazum "čekao" u Vijeću ministara BiH. Iz tog razloga Matić je predložio zaključak kojim će se od Vijeća ministara BiH tražiti formiranje mješovitog tijela, pri Ministarstvu vanjskih poslova BiH, koje će pratiti provođenje ovog sporazuma. Nakon rasprave, Informacija MVP-a primljena je k znanju a Zaključak jednoglasno usvojen.

#### **Ad. 6. Rasprava o komunikaciji i odnosima BiH sa susjednim zemljama (prijedlog za tačku dnevnog reda Milice Marković)**

Milica Marković je, kao predlagač ove tačke, predstavila radnu verziju teksta zaključka koji je, nakon usvajanja na sjednici Komisije, trebalo da bude upućen Ministarstvu vanjskih poslova BiH. Milica Marković je u svom tekstu pomenula nekoliko nastupa bh. političara koje smatra neprimjerenim diplomatskoj komunikaciji. Nanić je podržao Milicu Marković u njenom nastojanju da se, u ime Komisije, uputi poruka MVP-u BiH o potrebi bolje komunikacije i nepotrebnosti podizanja tenzija u regionu ali da pritom ne treba izdvajati pojedinačne ekscese i konkretizirati stvari. Potom je Živković podsjetio da je jedna od nadležnosti Komisije za vanjske poslove PDPSBiH praćenje vanjske politike Predsjedništva BiH a da Komisija nikada nije dobila dokument o prioritetima vanjske politike BiH, sačinjen od Predsjedništva BiH te se po tome može vidjeti da se pojedine institucije ne pridržavaju principa. Potom je predložio da se PD upute dva zaključka, i to da:

1. Predsjedništvo BiH dostavi okvire vanjske politike BiH
2. Predsjedništvo BiH više poradi na razvoju dobrosusjedskih odnosa

Predsjedavajući Matić je, govoreći o tekstu zaključka, koji je pročitala Milica Marković, konstatirao da je u kritikama i osudama prema pojedinim bh. zvaničnicima potencirana samo jedna strana i da je neprimjerene komunikacije bilo i od strane susjednih država. Milica Marković napomenula je predsjedavajućem Matiću da ne smije miješati ingerencije i da Komisija za vanjske poslove PSBiH ne može opominjati Stjepana Mesića ili bilo kojeg drugog zvaničnika susjedne zemlje nego da je dužnost fokusirati se na institucije BiH. Azra Alajbegović je također predložila sljedeći zaključak:

1. Zadužuje se Predsjedništvo BiH i Ministarstvo vanjskih poslova BiH da, najkasnije do 1. marta 2008., dostave Nacrt platforme o vođenju vanjske politike. Ovom zaključku predsjedavajući Matić dodao je riječi: "s posebnim akcentom na politiku prema susjednim zemljama". Ovakav prijedlog zaključka jednoglasno je usvojen, dok prijedlog zaključka Milice Marković, s dva glasa "za", dva "protiv" i jednim "suzdržanim", nije prihvaćen.

#### **Ad. 7. Tekuća pitanja**

Nije bilo tekućih pitanja.

Sjednica je završena u 11,15 sati.

Sekretar Komisije  
**Merdžana Iglica**

Predsjedavajući Komisije  
**Slavko Matić**